

四庫全書

經部

欽定四庫全書

日講春秋解義卷二

隱公

三年春王二月己巳日有食之

此書日食之始

公羊傳

何以書記異也日食則曷為或日或不日或言

朔或不言朔曰某月某日朔日有食之者食正朔也

桓公三年秋七月壬辰朔日有食之是也

其或日或不日或失之前或失

之後失之前者朔在前也

謂二日食己巳日有食之是也

失之後者

朔在後也

謂晦日食莊公十八年三月日有食之是也

穀梁傳

言日不言朔食晦日也其日有食之何也吐者

外壤食者內壤

壤日之輪廓其所吐出者壤在外其所吞食者壤入于內

闕然不

見其壤有食之者也

日既闕損不知壤之所在必有物食之

有內辭也

或外辭也

食者內壤故曰內辭吐者外壤故曰外辭傳無外辭之文者蓋時無外壤也而曰或

外辭者因事以推明義例耳

有食之者內于日也

日食既有兩種之辭今直云有

食之者為壤在于內也

其不言食之者何也

謂經不明言月之食日也知其

不可知也

聖人慎疑所謂不知為不知是知也

歷法周天之度日行疾月行遲日月一歲凡十二
會方會則月光都盡而為晦已會則月光復蘇而
為朔當月朔而日月之會東西同度南北同道則
月掩日而日為之食精歷算者皆能豫推之是有
常度矣既有常度可求則災而非異矣然每食必
書示後世以遇災而懼之意也亦以示後世治歷
明時之法也日者衆陽之宗為陰所掩王者於此
修德行政扶陽抑陰以見克謹天戒之意經書曰

食三十六示人君不可忽天象也

三月庚戌天王崩

左傳三年春王三月壬戌平王崩赴以庚戌故書之

公羊傳何以不書葬天子記崩不記葬必其時也至尊無所

屈也諸侯記卒記葬有天子存不得必其時也設有他故葬必

易期曷為或言崩或言薨天子曰崩諸侯曰薨大夫曰

卒士曰不祿等殺其詞以別尊卑

穀梁傳高曰崩厚曰崩尊曰崩天子之崩以尊也其崩

之何也以其在民上故崩之其不名何也大上故不

名也

名者所以相別耳居人之大在民之上故無所名

崩者上墜之形天子之尊四海之內皆當奔喪魯君聞赴不會有慢上之心故志崩不志葬以著其罪

夏四月辛卯尹氏卒

尹左作君

左傳夏君氏卒聲子也不赴于諸侯不反哭于寢不祔

于姑

隱不敢從正君之禮故亦不敢備禮于其母

故不曰薨不稱夫人故

不言葬不書姓為公故曰君氏

隱見為君故特書于經曰君氏

公羊傳

尹氏者何天子之大夫也其稱尹氏何貶曷為

貶譏世卿世卿非禮也外大夫不卒此何以卒天王

崩諸侯之主也

尹氏主儻贊諸侯

穀梁傳

尹氏者何也天子之大夫也外大夫不卒此何

以卒之也于天子之崩為魯主故隱而卒之

隱猶痛也周禮

大行人之職曰若有大喪則詔相諸侯之禮尹氏時在職而詔魯人之弔者

尹氏王朝世卿書卒來赴也古者論功命爵辨材

授職世祿而不世官故俊傑皆得在位威福不至
下移尹氏秉鈞為周階亂見於家父所刺考之左
氏傳世執王朝之政春秋於其告喪與立子朝以
子朝奔楚皆以氏書以著世卿之失為後世戒武
氏仍叔之子皆此義也且王臣不得外交其死也
亦不得赴告尹氏卒而來赴於魯越禮踰法書之
以明人臣之義杜朋黨之原又聖人之微旨也

附錄

左傳鄭武公莊公為平王卿士王貳于虢

西虢公亦仕王朝王

欲分仕之

鄭伯怨王王曰無之故周鄭交質王子狐為質

于鄭

狐平王子

鄭公子忽為質于周

忽莊公子

王崩周人將畀

虢公政四月鄭祭足帥師取溫之麥

祭足即祭仲也溫周畿內邑今

河南溫縣有古溫城

秋又取成周之禾

成周洛邑也今河南洛陽縣有故城

周鄭

交惡君子曰信不由中質無益也明恕而行要之以

禮雖無有質誰能閒之苟有明信澗谿沼沚之毛

山夾

水為澗山澗無所通為谿沼池也沚小渚也毛草也

蘋蘩蕒藻之菜

蘋大萍也蘩蒿蕒蒿蘩

藻聚藻也

筐筥錡釜之器

方曰筐圓曰筥有足曰錡無足曰釜筐筥皆竹器錡釜皆金器

潢汙行潦之水

潢汙停水行潦流潦

可薦于鬼神可羞于王公

羞進也

而況君子結二國之信

通言盟約彼此之情故云二國

行之以

禮又焉用質風有采蘩采蘋

義取不嫌薄物

雅有行葦沔酌

行葦義取忠厚沔酌義取行潦可供祭祀

昭忠信也

秋武氏子來求賻

此書來求之始

左傳武氏子來求賻王未葬也

公羊傳

武氏子者何天子之大夫也其稱武氏子何譏

何譏爾父卒子未命也

武氏子父新死未命而便為大夫薄父子之恩故稱氏言

子以何以不稱使當喪未君也

當喪謂天子也未君者喪未三年未可居

君位

稱使武氏子來求賻何以書譏何譏爾喪事無求求

賻非禮也蓋通于下

禮記少儀臣為君喪納貨貝於君則曰納甸於有司臣歸之禮

也君求之非禮也不獨天子為然

穀梁

傳武氏子者何也天子之大夫也天子之大夫其

稱武氏子何也未畢喪孤未爵未爵使之非正也其

不言使何也無君也

桓王在喪未即位故曰無君

歸死者曰賵歸

生者曰賻曰歸之者正也求之者非正也周雖不求

魯不可以不歸魯雖不歸周不可以求之求之為言
得不得未可知之辭也交譏之

武氏子天子大夫之嗣也不稱使者嗣王當喪未
得發命也古者諒陰百官總己以聽於冢宰三年
當是時而有所使稱王則同於至尊稱冢宰則疑
於無王故不稱使所以謹通喪之禮又以示君臣
名分之際如此其謹嚴也尺土一毛皆天子所有
君取於臣豈得言求魯不歸賻而周求之周之失

道魯之不臣皆可見矣武氏子仍叔之子或言之
或不言之何也蓋言武氏之子則似武氏之子自
來求賻若仍叔之子不言之又不見其父尚存聖
人之文所以如化工之賦物也

八月庚辰宗公和卒

左傳宋穆公疾名大司馬孔父而屬殤公焉曰先君舍

與夷而立寡人

孔父嘉孔子六世祖先君穆公兄宣公也與夷宣公子即殤公寡人

弗敢忘若以大夫之靈得保首領以沒先君若問與

夷其將何辭以對請子奉之以主社稷寡人雖死亦

無悔焉對曰羣臣願奉馮也

馮穆公子莊公

公曰不可先君

以寡人為賢使主社稷若棄德不讓是廢先君之舉

也豈曰能賢光昭先君之令德可不務乎吾子其無

廢先君之功使公子馮出居于鄭

辟殤公也

八月庚辰宗

穆公卒殤公即位君子曰宋宣公可謂知人矣立穆

公其子饗之命以義夫

命出于義

商頌曰殷受命咸宜百

祿是荷其是之謂乎

詩頌言殷湯武丁受命皆以義故仕荷天之百祿宣公能使其

子任荷天祿合
此詩之義也

穀梁
傳 諸侯曰卒正也

外諸侯卒來告則書魯君書薨臣子之辭也外諸
侯書卒非吾君也或不書名不知其名也左傳同
盟則赴以名非也豈有臣子當創鉅痛深之日而
稱先君之名以告隣國者乎且考之禮辭曰寡君
不祿則無稱名之義審矣趙氏匡謂或同會盟而
名見於載書或通朝聘而名見於簡牘故國史按

舊簡書而紀其名然晉獻公與魯未同會盟
通聘問而卒書名宿男同盟滕子杞子來朝而卒
不書名則義無處也孫氏覺謂即位之初以名赴
我亦無所據蓋承舊史之文而不可損益耳

冬十有二月齊侯鄭伯盟于石門

此書外諸侯特相盟之始齊今山東臨淄

縣西北營丘城石門杜注齊地或曰濟北盧縣故城西南濟水之門

左傳冬齊鄭盟于石門尋盧之盟也

盧杜注齊地濟北盧縣故城在今山

東長清縣西南境盧盟在春秋前

庚戌鄭伯之車僨于濟

僨仆也濟水名既盟

而遇大風傳紀異也

十二月無庚戌日誤

卷二

周室既微霸業未起諸侯無所統各相為黨宋魯
陳蔡衛為一黨齊鄭為一黨石門之盟齊鄭相結
也是盟也魯公不與經何以書蓋以為常事則不
必書以為非常之事則不可以不書記曰有虞氏
未施信於民而民信夏后氏未施敬於民而民敬
殷人作誓而民始畔周人作會而民始疑傳曰誥
誓不及五帝盟詛不及三王聖人有志於大道為

公之世故凡盟不削乃以是為非常而志之也

癸未葬宗穆公

穆公羊穀梁作繆

公羊傳

葬者曷為或日或不日不及時而日渴葬也

不及

時不及五月也渴喻急也

不及時而不日慢葬也

慢薄不能以禮葬

過時

而日隱之也

隱痛賢君不得以時葬也

過時而不日謂之不能葬

也

解緩不能以時葬

當時而不日正也當時而日危不得葬

也此當時何危爾宣公謂繆公曰以吾愛與夷則不若愛女以為社稷宗廟主則與夷不若女盍終為君

矣宣公死繆公立繆公逐其二子莊公馮與左師勃

左師官勃名也

曰爾為吾子生母相見死母相哭

所以遠絕之

與

夷復曰先君之所為不與臣國而納國乎君者以君
可以為社稷宗廟主也今君逐君之二子而將致國
乎與夷此非先君之意也且使子而可逐則先君其
逐臣矣繆公曰先君之不爾逐可知矣吾立乎此攝
也終致國乎與夷莊公馮弑與夷故君子大居正宗
之禍宣公為之也

穀梁
傳 日葬故也危不得葬也

外諸侯之葬有書有不書所以紀邦交之厚薄也
蓋據魯人會葬以為言故不曰宋葬穆公而曰葬
宋穆公其卒見於經而不書葬者彼雖來赴而魯
不往會也凡此皆舊史之文也其變例有三一曰
賊不討不書葬隱公之薨而不葬所以責臣子之
不能討賊也宋殤齊昭之不書葬視此矣一則諱
其辱晉景公之喪成公往弔晉人止公送葬諸侯

莫在魯人辱之故諱而不書一曰避其號吳楚之君書卒者十襄公如楚嘗親送其葬於西門之外矣其餘必多遣使會葬而無一見於經蓋據屬詞常法當書葬楚某王葬吳某王故削而不書也示討賊之義避僭王之名乃聖人之特筆而諱晉之辱或亦因魯史之舊文與

附錄左傳

衛莊公娶于齊東宮得臣之妹曰莊姜

得臣齊大夫名

美而無子衛人所為賦碩人也又娶于陳曰厲嬀

陳國

今河南陳州是也

生孝伯早死其姊戴媯生桓公莊姜以為

己子

厲戴皆謚媯陳姓也桓公名完

公子州吁嬖人之子也

賤而得幸曰嬖

有寵而好兵公弗禁莊姜惡之石碏諫曰

石碏衛大夫

臣

聞愛子教之以義方弗納于邪驕奢淫佚所自邪也

四者之來寵祿過也將立州吁乃定之矣若猶未也

階之為禍失寵而不驕驕而能降降而不憾憾而能

矜者鮮矣

降謂強降其心矜重也謂自重其身也

且夫賤妨貴少陵長

遠間親新聞舊小加大淫破義所謂六逆也君義臣

行父慈子孝兄愛弟敬所謂六順也去順效逆所以速禍也君人者將禍是務去而速之無乃不可乎弗

聽其子厚與州吁游

厚石碣子

禁之不可桓公立乃老

老致

仕也四年經書州吁弑其君故傳先經以始事

四年春王二月莒人伐杞取牟婁

此書伐國取邑之始杞杜注本都雍丘遷

都淳于雍丘今河南杞縣淳于今山東安丘縣有故城牟婁杜注杞邑今諸城縣有婁鄉城

公羊傳

牟婁者何杞之邑也外取邑不書此何以書疾

始取邑也

凡外小惡不書取邑差為重故先治之

穀梁傳

傳曰言伐言取所惡也

稱傳曰者穀梁子不親受于師而聞之于傳者

既伐其國又取其土明伐不以罪而貪其利故兩書取伐以彰其惡

諸侯相伐取地于

是始故謹而志之也

取者收奪之名諸侯土地受之天王傳之先祖彊者不得并魚弱者不宜失守也莒人聲罪伐人而彊奪其土故特書曰取以著其惡然隱桓以後傳言外取地甚衆而無一見於經何也入春秋之始猶以取邑為重中葉以後疆場之邑爭奪滋多一

彼一此失得無常有不可勝書者矣僖公取濟西
田成公取汶陽田乃復吾故田而亦書取何也不
請於天王以正疆理而擅兵爭奪與取非所有者
何以異乎前書莒人入向天討不加至是伐杞取
邑為暴益甚春秋於此蓋深惜九伐不行而憑弱
犯寡之肆行無忌云

戊申衛州吁弑其君完

州穀梁作祝
此書弑之始

左傳四年春衛州吁弑桓公而立

公羊傳 曷為以國氏當國也

穀梁傳

大夫弑其君以國氏者嫌也弑而代之也

竊據君位

故曰嫌

州吁衛公子程子謂春秋之初弑君者多不稱公子公孫蓋身為大惡自絕於先君也大義既明於初其後則皆以其屬稱或見其以親而寵任太過或見其以天屬而反為賊亂立義各不同也孔氏穎達則謂自莊公以上諸弑君者皆不書氏閔公

以下皆書氏乃時史有異同非仲尼所筆削理亦
可通竝存以俟參考

夏公及宋公遇于清

此書遇之始清杜注衛邑濟北東阿縣有清亭今東阿縣屬山東兗

州府

左傳公與宋公為會將尋宿之盟

宿盟在元年

未及期衛人

來告亂夏公及宋公遇于清

公羊傳

遇者何不期也一君出一君要之也

言及公要之也

穀梁傳

及者內為志焉爾遇者志相得也

不期而會曰遇今曰內為

志非不
期也

不期而會曰遇清衛邑也古者諸侯或因朝覲或
從王事無期約而適值於途必有兩君相見之儀
近者為主遠者為賓稱先君以相接所以崇禮讓
而絕慢易也周衰諸侯放恣非朝非會私為之約
各簡其禮如道路相值者然異於古之不期而遇
矣魯宗將尋宿之盟以衛來告亂而相見於清謂
之不期而會可乎春秋志內之遇四竝書及若曰

以此及彼然也志外之遇三竝以爵若曰以尊及卑然也皆莫適為主之辭而其出不以事接不以禮之罪具見矣

宋公陳侯蔡人衛人伐鄭

此書諸侯會伐之始亦東諸侯分黨之始蔡今河南上蔡

縣縣西南有故城

左傳宋殤公之即位也公子馮出奔鄭鄭人欲納之及

衛州吁立將修先君之怨于鄭

謂二年鄭人伐衛之怨

而求寵

于諸侯以和其民

諸暴立者諸侯既與之會則不復討故求此寵

使告于宋

曰君若伐鄭以除君害

謂公子馮

君為主敝邑以賦與陳

蔡從則衛國之願也宋人許之于是陳蔡方睦于衛

故宋公陳侯蔡人衛人伐鄭圍其東門五日而還公

問于衆仲曰

衆仲魯臣

衛州吁其成乎對曰臣聞以德和

民不聞以亂以亂猶治絲而棼之也

棼亂也

夫州吁阻

兵而安忍

阻恃也

阻兵無衆安忍無親衆畔親離難以

濟矣

恃兵則民殘民殘則衆叛安忍則刑過刑過則親離

夫兵猶火也弗戢將

自焚也夫州吁弑其君而虐用其民于是乎不務令

德而欲以亂成必不免矣

州吁弑君自立欲藉諸侯之寵以和其民因揣宋
殤之忌公子馮為伐鄭之說以動宋而已亦託修
先君廩延之怨構成兵端則首謀者衛也而春秋
以宗主兵此聖人誅亂賊必治其黨與之法也宋
為大國於衛鄰近州吁弑逆義所當誅宋既不能
申鄰國討賊之義乃反與亂賊為黨連兵伐鄭以
遂其邪謀則人欲肆而天理滅矣故春秋以宋公

為首諸國為從所以彰大義於天下也

秋翬帥師

此書大夫會伐之始

左傳秋諸侯復伐鄭宗公使來乞師公辭之

從衆仲羽之言

父請以師會之

羽父翬之字

公弗許固請而行故書曰翬

帥師疾之也

公羊傳翬者何公子翬也何以不稱公子貶曷為貶與

弑公也其與弑公奈何公子翬諂乎隱公謂隱公曰

百姓安子諸侯悅子盍終為君矣隱公曰否吾使修

塗裘吾將老焉

塗裘邑名

公子翬恐若其言聞乎桓于是

謂桓曰吾為子口隱矣

口以口語相發動也

隱曰吾不反也

誼稱

傳者所加

桓曰然則奈何曰請作難弑隱公子鍾巫之祭

焉弑隱公也

穀梁傳

翬者何也公子翬也其不稱公子何也貶之也

外大夫貶皆稱人內大夫貶皆去族稱名

何為貶之也與于弑公故貶也

天下惟大權最不可假人而兵權尤甚凡亂賊之

欲動於惡未有不專主兵權者人主誠能辨之於

早逆折其心則弑逆之萌杜矣宗殤連諸侯以伐
鄭使來乞師隱公辭而弗許而翬乘此以竊兵權
固請而行翬於是時已有無君之心故先儒以為
鍾巫之禍自帥師會伐始也

會宗公陳侯蔡人衛人伐鄭

左傳諸侯之師敗鄭徒兵取其禾而還

時鄭不車戰

前書宗公陳侯蔡人衛人伐鄭此但言翬帥師會
伐鄭於文義甚為簡明而再序四國何也言之重

詞之複其中必有大美惡焉州吁弑君人倫大變
宋及陳蔡黨惡構禍以反天常輦又往會使亂臣
賊子之勢益張此世變之極也聖人重言以著其
惡而未幾魯宋胥構篡弑之禍豈非蔑義亂倫氣
類實相為感召哉

九月衛人殺州吁于濮

濮杜注陳地水名

左傳州吁未能和其民厚問定君于石子

石子石碯也

石子

曰王覲為可曰何以得覲曰陳桓公方有寵于王

桓公

稱謚左氏追書

陳衛方睦若朝陳使請必可得也厚從州吁

如陳石碣使告于陳曰衛國褊小老夫耄矣無能為

也此二人者實弑寡君敢即圖之陳人執之而請泣

于衛

請衛人自臨討之

九月衛人使右宰醜泣殺州吁于濮

右宰官名醜衛臣名

石碣使其宰孺羊肩涖殺石厚于陳

宰石碣家

臣也孺羊肩宰之姓名

君子曰石碣純臣也惡州吁而厚與焉

大義滅親

古語

其是之謂乎

公羊傳

其稱人何討賊之辭也

人人得而討之

穀梁傳

稱人以殺殺有罪也祝吁之挈失嫌也

衆所不與故直

挈其名而道之無據位之嫌

其月謹之也于濮者譏失賊也

譏其不即

討

州吁之殺石碯主之而書衛人者弑君之賊人人得而誅之不必士師所以廣忠孝之路也若書石碯則似一人之私討而不見其從衆望誅有罪矣濮陳地據左氏陳人與有力焉而不以討賊之義予之者州吁阻兵乘權衛之臣子力不能誅至於

失賊之久實因四國連兵欲定其位耳故聖人以
討賊與衛人以失賊罪諸侯程子謂春秋為爰書
觀此類可以得其義例矣

冬十有二月衛人立晉

左傳衛人逆公子晉于邢

邢國名姬姓侯爵杜注在廣平襄國縣今直隸邢臺縣有

襄國故城

冬十二月宣公即位書曰衛人立晉衆也

公羊傳

晉者何公子晉也立者何立者不宜立也其稱

人何衆立之之辭也然則孰立之石碣立之石碣立

之則其稱人何

與尹氏立王子朝不稱人異詞故設問

衆之所欲立也

衆雖欲立之其立之非也

穀梁傳

衛人者衆辭也立者不宜立者也晉之名惡也

惡謂不正

其稱人以立之何也得衆也得衆則是賢也賢

則其曰不宜立何也春秋之義諸侯與正而不與賢

也

正謂嫡長

人者衆辭立者不宜立也晉乃桓公之弟莊公之

子以次當立國人所共推戴而謂其不宜立者衛

之臣子可以討賊不可以置君晉雖諸侯之子而
內不承國於先君上不請命於天子衆謂宜立而
遂自立焉可乎故春秋於衛人特書立晉以著擅
置其君之罪於晉去其公子以明不請王命之非
而父子君臣之道正矣然曰衛人立晉則一國之
公也與書尹氏立朝為一族之私者異矣此聖人
之權衡所以不爽於毫末也

日講春秋解義卷二

欽定四庫全書

日講春秋解義卷三

隱公

五年春公觀魚于棠

觀左作矢棠今山東魚臺縣魚亭山是其處

左傳

五年春公將如棠觀魚者

魚捕魚也魚者猶言獵者

臧僖伯諫

曰

臧僖伯公子強也諡曰僖

凡物不足以講大事

大事祀與戎

其材不

足以備器用

材謂皮革齒牙骨角毛羽器用軍國之器

則君不舉焉君將

納民于軌物者也故講事以度軌量謂之軌取材以

章物采謂之物不軌不物謂之亂政亂政亟行所以

敗也故春蒐夏苗秋獮冬狩

蒐索也擇取不孕者苗為苗除害也獮殺也以

殺為名順秋氣也狩圍守也冬物畢成獲則取之無所擇也

皆于農隙以講事也

三年而治兵入而振旅

雖四時講武猶復三年大習振整也

歸而飲至

以數軍實

數車徒器械及所獲也

昭文章

車服旌旗

明貴賤辨等列

順少長

出則少者在前還則在後所謂順也

習威儀也鳥獸之肉不登

于俎

俎祭宗廟器

皮革齒牙骨角毛羽不登于器

以飾法度之器

則公不射古之制也若夫山林川澤之實器用之資

阜隸之事

士臣阜阜臣與與臣隸

官司之守非君所及也公曰

吾將畧地焉

畧總攝巡行之名言欲案行邊竟

遂往陳魚而觀之

陳設

也謂大設捕魚之備而觀之

僖伯稱疾不從書曰公矢魚于棠

亦矢

陳非禮也且言遠地也

棠實他竟故曰遠地

公羊傳

何以書譏何譏爾遠也公曷為遠而觀魚登來

之也

齊人語也齊人名求得為得來作登來者由口授也

百金之魚公張之

張謂

張罔罟正以價值百金故言得來之

登來之者何美大之之辭也棠者

何濟上之邑也

穀梁傳

傳曰常事曰視

視朔之類

非常曰觀

觀魚之類

禮尊不親

小事卑不尸大功

尸主

魚卑者之事也

周禮獻人主中士下士

公觀

之非正也

君舉必書故諸侯非朝覲會同省耕省斂不得輕

出隱公慢棄國政遠事逸遊託畧地之說拒諫飾

非故特書其事以志非禮

附錄左傳

曲沃莊伯以鄭人邢人伐翼

曲沃晉別封成師之邑今山西聞喜

縣莊伯成師子翼晉舊都今山西翼城縣

王使尹氏武氏助之

尹氏武氏皆周世族

大翼侯奔隨

隨杜注晉地今山西介休縣東有古隨城晉內相攻伐不告亂故不書傳具其

事為後晉
事張本

夏四月葬衛桓公

左傳

夏葬衛桓公衛亂是以緩

有州吁之亂十四月乃葬明其非慢

穀梁傳

月葬故也

衛桓公被弑至是閱十四月而後得葬魯往會之
故書弑逆人道之大變送終臣子之大事君弑而
臣子能討賊以葬其君然後送終之道盡故春秋

於見弑之君必賊既討而後書葬也諡者行之迹也衛侯見弑而諡以桓名實乖矣周制五等諸侯禮辭皆稱公又有公食大夫禮葬以鄰國會之為義故從周之文而不革也

附錄左傳

四月鄭人侵衛牧

牧衛邑今河南汲縣地

以報東門之役

東門役在四年

衛人以燕師伐鄭

燕南燕國姑姓伯爵今汲縣西有古東燕城

鄭

祭足原繁洩駕以三軍軍其前使曼伯與子元潛軍

軍其後燕人畏鄭三軍而不虞制人

制北制鄭邑

六月鄭

二公子以制人敗燕師于北制

二公子曼伯子元也

君子曰不

備不虞不可以師 曲沃叛王秋王命虢公伐曲沃

而立哀侯于翼

翼侯子光

秋衛師入邲

邲公羊作盛國名姬姓伯爵今山東寧陽縣北有盛鄉城

左傳衛之亂也邲人侵衛故衛師入邲

公羊傳

曷為或言率師或不言率師將尊師衆稱某率

師將尊謂大夫師衆者將尊師少稱將

師少者不滿二千五百人

將卑師衆稱師

將卑謂士

將卑師少稱人君將不言率師

書其重者也

穀梁傳

入者內弗受也邾國也將卑師衆曰師衛與邾

皆文之昭也邾乘亂侵衛固為非禮衛宣繼州吁暴亂之後當懲艾修德以固邦本以恤民力乃輕動大衆以入同姓之國故書衛師入邾譏其用衆而逞暴也

九月考仲子之宮

公羊傳

考宮者何考猶入室也始祭仲子也

考成也成仲子之宮

廟而祭之猶生人入桓未君則曷為祭仲子隱為桓宮室必有飲食之事

立故為桓祭其母也然則何言爾成公意也

穀梁考者何也考者成之也成之為夫人也

立其廟世祭之

成夫人之禮禮庶子為君為其母築宮使公子主其祭也

公當奉宗廟故不得自主別廟之祭公子者長子之弟及妾之子于子祭于孫止仲

子者惠公之母隱孫而修之非隱也

非責也

仲子者惠公之妾桓公之母宮始成而祭之曰考禮諸侯無二嫡庶子既立為君則為其母別立宮

以祀之其祭也以公子主之君不親祭尊宗廟也
桓未為君何以為其母立廟隱將舉國而讓之也
經於來賄考宮皆書仲子而其不得為嫡明矣隱
公攝讓之實辨矣桓公篡弑之罪昭矣凡宮廟之
立非失禮不書此著其不宜立也不書立宮而書
考宮蓋連下初獻六羽以為義

初獻六羽

左傳九月考仲子之宮將萬焉

萬舞也

公問羽數于衆仲

對曰天子用八

八八八十六人

諸侯用六

六六三十六人

大夫四

四四

十六

士二

二二四人有功賜用樂

夫舞所以節八音而行八風

八音金石絲竹匏土革木八風八方之風為調風明庶風清明風景風涼風閭闔風不周風廣莫風節者使音聲有作止之序行者宣布其風氣也故自八以下

惟天子得盡物數故以八為列諸侯

則不敢用八

公從之于是初獻六羽始用六佾也

公羊傳

初者何始也六羽者何舞也初獻六羽何以書

譏何譏爾譏始僭諸公也六羽之為僭奈何天子八

佾諸公六諸侯四諸公者何諸侯者何天子三公稱

公王者之後稱公其餘大國稱侯小國稱伯子男天子三公者何天子之相也天子之相則何以三自陝而東者周公主之自陝而西者召公主之一相處乎內始僭諸公昉于此乎前此矣前此則曷為始乎此僭諸公猶可言也僭天子不可言也

穀梁傳

初始也穀梁子曰舞夏

夏大也

天子八佾諸公六

佾諸侯四佾初獻六羽始僭樂矣尸子曰舞夏自天子至諸侯皆用八佾初獻六羽始厲樂矣

言時諸侯皆僭用八

佾魯于是能自減厲而始用六穀
梁子言其始僭尸子言其始降

舊說成王特賜周公以天子之禮樂故魯得以八
佾祀周公然猶止於周公之廟耳至其後羣公皆
僭用焉仲子以別宮故不敢上同羣廟而用六羽
書初獻者明前此用八之僭也不謂之佾而曰羽
者佾乃千羽之總稱羽以象文德干以象武功婦
人無武事則獨奏文樂故謂之羽而不曰佾也春
秋於魯之郊禘皆因事而書以志其僭故僭用八

佾亦因考仲子之宮而書初獻以明之若仲子之不宜別宮獻羽則不待貶而自見矣

邾人伐宗

左傳

邾人取邾田邾人告于鄭曰請君釋憾于宗敝邑

為道

釋四年再見伐之憾

鄭人以王師會之

鄭莊為王卿士故得用王師不書不

以告也

伐宗入其郛以報東門之役

東門役在四年

宋人使來

告命公聞其入郛也將救之問于使者曰師何及對

曰未及國公怒乃止

怒其詭辭

辭使者曰君命寡人同恤

社稷之難今問諸使者曰師未及國非寡人之所敢

知也

為七年公
伐邾傳

邾搆鄭以伐宋則主兵者邾也故序鄭上凡班序
上下以國之大小從禮之常也而會盟侵伐以主
者先因事之變也故僖二十七年楚人陳侯蔡侯鄭
伯許男圍宋大夫主兵亦序於諸侯之上所以著
事端所由起以別其善惡之所歸也

螟

此書蟲
災之始

公羊傳

何以書記災也

穀梁傳

蟲災也甚則月不甚則時

蟲食苗心曰螟言其害在內冥冥難知也稼穡為民生首務螟之害稼國之災也春秋於災異必書示人君當恐懼修省以謹天戒恤民隱也

冬十有二月辛巳公子彊卒

左傳冬十二月辛巳臧僖伯卒公曰叔父有憾于寡人

恨諫觀魚不聽

寡人弗敢忘葬之加一等

穀梁傳

隱不爵命大夫

隱居攝故不爵命大夫

其曰公子彊何也

先君之大夫也

公子不為大夫則不稱公子

彊稱公子以公葬之有加禮也觀魚之諫公雖不聽而猶不忘其忠死而加禮於義為得然知其忠而不納其言則與郭公之善善而不能用等耳

宋人伐鄭圍長葛

此書圍之始長葛杜注鄭邑今河南長葛縣有故城

左傳宋人伐鄭圍長葛以報入郭之役也

公羊傳

邑不言圍

據伐於餘丘不言圍

此其言圍何彊也

惡其彊而無義

必欲得邑

穀梁傳

伐國不言圍邑此其言圍何也久之也

以此冬圍之至

六年冬乃取之也

伐不踰時戰不逐奔誅不填服

填

苞人民

毆牛馬曰侵

苞制也

斬樹木壞宮室曰伐

環而攻之曰圍以此年之冬圍至六年之冬而後取之直書而惡自見矣外伐國圍邑四自僖公後無復見於經者春秋之初猶以圍邑為重也兵爭日多疆場之邑一彼一此攻奪無常則不復赴告

於鄰國矣

六年春鄭人來輸平

輸左作渝

左六年春鄭人來渝平更成也

渝變也公之為公子戰于狐壤為鄭所執

逃歸怨鄭鄭伐宋公欲救宋宋使者失辭公怒而止忿宋則欲厚鄭鄭因此而來故經曰渝平傳曰更成

公羊輸平者何輸平猶墮成也何言乎墮成敗其成

也曰吾成敗矣

吾魯也

吾與鄭人未有成也吾與鄭人

則曷為未有成狐壤之戰隱公獲焉然則何以不言

戰諱獲也

君獲不言師敗績故以輸平諱也

穀梁傳

輸者墮也平之為言以道成也來輸平者不果

成也

春秋前魯與鄭平四年暈與宋伐鄭故來絕魯壞前平也

平者兩國昔有怨忿解釋而使之平也輸謂輸寫
其情鄭何為輸情而求平於魯以利相結而離魯
宋之黨也據左氏公之未立與鄭人戰于狐壤止
馬元年與宋盟于宿四年遇于清其秋會師伐鄭
即魯宋為黨而與鄭有怨明矣五年鄭人伐宋宋
來告命使者失辭公怒不救鄭人知其間可棄故

來輸平而自是魯遂合於鄭也何以知其以利相
結也後此鄭來歸祊而公遂會鄭伐宋取郕及防
皆歸於我則其輸平乃以利相結可知矣公穀以
輸平為墮成非也前此魯鄭未嘗結好不宜言墮
左氏作淪謂變前惡而為和好以前年翬會伐鄭
證之於情事為合故胡氏安國用左氏之義而不
從其文主公穀作輸而易其詁曰納也

附錄
左傳

翼九宗五正頃父之子嘉父逆晉侯于隨

唐叔
始封

受懷姓九宗職官五正九宗一姓為九族也五正五官之長頃父之子嘉父晉大夫新為大夫未甚著見故繫之納諸鄂晉人謂之鄂侯鄂晉別邑在今山西鄉寧縣南

夏五月辛酉公會齊侯盟于艾

此書齊魯交好之始艾山名在今山東蒙陰縣

西北

左傳夏盟于艾始平于齊也

春秋前魯與齊不平今乃結好故言始平于齊

宋殤既合五國之師以伐鄭又環其邑而圍之鄭之怨宋深矣去年與邾伐宋未足以釋憾故特平齊魯為他日伐宋之謀魯與齊盟而曰鄭莊合齊

魯者以三年齊鄭盟石門知齊鄭合黨故也盟不
書及而書會則非魯志而齊欲為盟也春秋通例
凡書盟者惡之而況於植黨行私乎

附錄
左傳

五月庚申鄭伯侵陳大獲往歲鄭伯請成于陳

陳侯不許五父諫曰

五父陳
公子佗

親仁善鄰國之寶也君

其許鄭陳侯曰宋衛實難鄭何能為遂不許君子曰

善不可失惡不可長其陳桓公之謂乎長惡不悛

悛止

也從自及也

從隨也

雖欲救之其將能乎商書曰惡之

易也如火之燎于原不可鄉邇其猶可撲滅周任有

言曰

周任周大夫

為國家者見惡如農夫之務去草焉芟

夷蒞崇之絕其本根勿使能殖則善者信矣

芟刈也夷殺也

蒞積也崇聚也

秋七月

公羊傳

此無事何以書春秋雖無事首時過則書

首始也時

四時也過歷也歷一時無事則書其始月

首時過則何以書春秋編年四

時具然後為年

春秋之法雖無事必書時而繫以首月四時具而後成歲也事在仲月季月則不書首月而書時以冠其月月必繫於時也

冬宗人取長葛

左傳秋宗人取長葛

經書冬而傳書秋蓋秋取冬乃告也

公羊傳

外取邑不書此何以書久也

古者師出不踰時今宗更年取邑暴

師苦衆故書以疾之

穀梁傳

外取邑不志此其志何也久之也

不言鄭長葛者蒙上文伐鄭圍長葛之文也以鄭
莊之雄黠非不能保長葛而委之於宋蓋方連結
齊魯為後日報復之計也宋殤役衆經年肆行貪
暴而忌鄭之深實由公子馮之在鄭也其不善之
積已著而不可解矣

附錄左傳

冬京師來告饑公為之請糴于宋衛齊鄭禮也

告饑不以王命故傳言京師而不書于經

鄭伯如周始朝桓王也

桓王即位

周鄭交惡至是乃朝故曰始

王不禮焉周桓公言于王曰我周之

東遷晉鄭焉依

周桓公周公黑肩也食采于周故城在今陝西岐山縣南平王東徙晉文

侯鄭武公左右王室故曰晉鄭焉依

善鄭以勸來者猶懼不莠

莠至也况

不禮焉鄭不來矣

為桓五年諸侯從王伐鄭傳

七年春王三月叔姬歸于紀

穀梁傳

其不言逆何也逆之道微無足道焉爾

逆者非卿

叔姬伯姬之娣古者諸侯一娶九女嫁女之國必

以姪娣從二國來媵亦以姪娣從二年伯姬歸于

紀叔姬至是始歸者待年也娣歸不書而叔姬書

以其後紀亡叔姬不歸宗國而歸於鄫能全婦道
以賢而得書故此年特書其歸將有其末必著其
本也

滕侯卒

滕國今山東滕縣
西南古滕城是也

左

七年春滕侯卒不書名未同盟也凡諸侯同盟于

是稱名故薨則赴以名

盟以名告神故薨
亦以名告同盟

告終稱嗣

也

告亡者之終
稱嗣位之主

以繼好息民謂之禮經

公羊

何以不名微國也微國則其稱侯何不嫌也春

秋貴賤不嫌同號美惡不嫌同辭

穀梁傳

滕侯無名少曰世子長曰君狄道也其不正者

名也

諸侯卒書名滕侯不名程子謂史闕文也不書葬魯不會也古者邦交有常春秋之時則惟以彊弱為厚薄如晉楚之遠而魯君親奔其喪以俟其葬滕鄰境也宿同盟也而赴告雖及不會其葬無其事闕其文魯史之舊也聖人無加損焉存其卒闕

其葬而義自見矣

夏城中丘

此書土功之始中丘魯地今山東沂州東北有中丘城

左傳夏城中丘書不時也

公羊傳

中丘者何內之邑也城中丘何以書以重書也

以功重故書

穀梁傳

城為保民為之也民衆城小則益城益城無極

凡城之志皆譏也

凡書城者完舊也書築者創始也春秋凡用民力

必書其所興作不時害義固為罪矣雖時且義亦
書見勞民為重事也然僖公嘗修泮宮復閼宮矣
非不用民力也而不書蓋復古興廢奉先育賢乃
為國之先務雖用民力不可以已故以為常事而
不書耳

齊侯使其弟年來聘

此書列國來聘之始

左傳齊侯使夷仲年來聘結艾之盟也

艾盟在六年

公羊傳

其稱弟何

諸侯之子稱公子

母弟稱弟母兄稱兄

謂同母弟

兄

卷三

穀梁傳

諸侯之尊弟兄不得以屬通

禮非始封之君則臣諸父昆弟匹敵

之稱人臣不可以敵君故不得以屬通所以別貴賤明尊君卑臣之義

其弟云者以其

來接于我舉其貴者也

弟為臣之親貴者

年者僖公母弟也其不稱公子而變文書弟者罪

僖公以母弟之故而寵愛之過也親親之道尊其

位重其祿而非賢則不及以政事僖公私於同母

寵愛異於他弟聘魯致女交政鄰國一以委之遂

致亂嫡庶之辨以啟異日無知篡弑之階故特書弟以示貶著禍亂之所由始也使使致問曰聘古者諸侯間於天子之事乃有殷聘之禮自隱公即位未嘗朝周而受同列之聘是後內外交聘八十有七而尊王之禮罕見故悉書以示譏焉

秋公伐邾

此書伐邾之始

左傳秋宋及鄭平七月庚申盟于宿公伐邾為宋討也

為宋報入邾之憾

公與邾人元年盟于蔑至是而伐邾為宗討也其
為宗討何也魯嘗拒宗而與鄭平今鄭復與宗盟
故懼而伐邾欲以悅宗也用此見經之書伐乃紀
其用兵之實迹以別於侵而非謂主兵者皆有言
可執見伐者皆有罪可討至於渝蔑之盟則不待
貶而自見矣

冬天王使凡伯來聘

此書王聘之始凡國名姬姓伯爵
杜注汲郡共縣東南有凡城在今

河南輝
縣西

戎伐凡伯于楚丘以歸

此書戎患之始楚丘杜注衛地今山東曹縣東楚丘亭是也

左傳

初戎朝于周發幣于公卿

發陳也

凡伯弗賓

凡伯周卿士

冬王使凡伯來聘還戎伐之于楚丘以歸

傳言凡伯所以見伐

公羊傳

凡伯者何天子之大夫也此聘也其言伐之何

執之也執之則其言伐之何大之也

尊天王命責當死位故使與國

同

曷為大之不與夷狄之執中國也其地何大之也

天子大夫衛王命而被伐所在當赴其難與國君等

穀梁傳

凡伯者何也天子之大夫也國而曰伐此一人

而曰伐何也大天子之命也戎者衛也戎衛者為其
伐天子之使貶而戎之也楚丘衛之邑也以歸猶愈

乎執也

諱執言以歸
尊尊之正義

周禮時聘以結諸侯之好諸侯不修臣職而聘之
非王法也國而曰伐此一人而曰伐見其以徒衆
也楚丘衛地王使過賓戎伐之而衛不救是不臣
也凡伯見執不能死於其位而從之歸是失身也
王靈之不振如此此桓文之功所以不可沒與

附錄

左傳 陳及鄭平

六年鄭侵陳大獲今乃平

十二月陳五父如鄭涖

盟士申及鄭伯盟歆如忘

志不

在歆 洩伯曰

洩伯鄭

五父

必不免不賴盟矣鄭良佐如陳涖盟

良佐鄭大夫

辛巳及

陳侯盟亦知陳之將亂也

入其國觀其政治故總言之也為桓五年六年陳亂

蔡人殺陳佗傳

鄭公子忽在王所故陳侯請妻之

以忽有王寵故

鄭伯許之乃成昏

為鄭忽失齊昏援以至出奔傳

日講春秋解義卷三

欽定四庫全書

經部

日講春秋解義卷

四至七

詳校官監察御史_臣莫瞻菴

給事中_臣溫常綬覆勘

覆校官中書_臣田尹衡

校對官主事_臣張培

謄錄監生_臣張永浙

欽定四庫全書

日講春秋解義卷四

隱公

八年春宋公衛侯過于垂

垂杜注衛地濟陰句陽縣東北有垂亭今山東曹州北句

陽盾是
其地也

左八年春齊侯將平宋衛

平宋衛于鄭

有會期宋公以幣

請于衛請先相見衛侯許之故過于犬丘

犬丘垂也地有兩名

殺梁

不期而會曰過過者志相得也

按左氏齊侯將平宋衛于鄭而以經考之後此瓦
屋宋齊衛參盟而鄭不與十年入鄭伐戴又宋衛
為黨以仇鄭則此遇所謀蓋欲從齊而無意于釋
鄭憾也三國既有會期而宋以幣請先見則非不
期而遇可知矣

三月鄭伯使宛來歸祊庚寅我入祊

祊公羊穀梁作邛杜注鄭祀泰山之

邑今山東費縣治故祊城是也

左傳鄭伯請釋泰山之祀而祀周公以泰山之祊易許

田三月鄭伯使宛來歸祊不祀泰山也

許田成王賜周公朝宿之

邑後世因立周公別廟焉地近鄭祊鄭助祭泰山湯沐之邑地近魯鄭以天子不能復巡狩故欲以祊易許田各從本國所近恐魯以周公別廟為疑故云已廢泰山之祀欲為魯祀周公避辭以求之也

公羊傳宛者何鄭之微者也邴者何鄭湯沐之邑也天

子有事于泰山諸侯皆從泰山之下諸侯皆有湯沐

之邑焉

有事者巡狩祭天告至之禮也當沐浴潔齊以致其敬故謂之湯沐邑所以尊待諸侯而

共其費也其言入何難也

入非已至之文難詞也

其日何難也

言不可即

入至此日乃入也

其言我何言我者非獨我也

自入邑不得言我有他人

在其中乃齊亦欲之

以齊與魯鄭比聘會知之

穀梁名宛所以貶鄭伯惡與地也

去其族惡擅易天子邑

入者

內弗受也日入惡入者也邠者鄭伯所受命于天子

而祭泰山之邑

入之例見前嫌易田與兵入異故重發之

六年鄭人來輸平蓋請以祊歸也今使宛來歸祊

蓋將以易許也許者朝宿之地在王畿之內成王

所以特賜周公也祊者湯沐之邑在泰山之旁宣

王所以特賜鄭伯也祊近于魯許鄰于鄭故各以

所便相易用此見鄭有無君之心而謂天王不復
能巡狩矣用此見鄭有無親之心而敢以先祖所
受之邑與人矣入者不順之詞非我所有而彊入
之也

附錄
左傳夏虢公忌父始作卿士于周

周人遂
畀之政

四月甲辰鄭公子忽如陳逆婦媯辛亥以媯氏歸甲
寅入于鄭陳鍼子送女先配而後祖鍼子曰是不為
夫婦誣其祖矣非禮也何以能育

鍼子陳大夫禮逆
婦必先告祖廟而

後行鄭忽先逆婦而後告廟故曰先配而後祖

夏六月己亥蔡侯考父卒

穀梁傳諸侯曰卒正也

辛亥宿男卒

穀梁傳宿微國也未能同盟故男卒也

周人以諡易名在禮赴告之詞曰寡君不祿則赴不以名明矣而卒以名書以會盟聘問素與魯通故志其人以別其世次也已通而不名者舊史失

之也宿與魯元年同盟而卒不書名則他可知矣
蔡宣公未與魯通而卒書名蓋別有所徵凡此類
皆舊史之文孔子不得而加損者也

秋七月庚午宋公齊侯衛侯盟于瓦屋

此書外參盟之
始瓦屋杜注周

地今河南洧川縣
南瓦屋里是也

左齊人卒平宋衛于鄭秋會于溫盟于瓦屋以釋東

門之役禮也

會溫不書不以告也
鄭不與盟故不書

殺梁
傅

外盟不日此其日何也諸侯之參盟于是始故

謹而日之也

三人為盟
曰參盟

詰誓不及五帝盟詛不及三

王交質子不及二伯

瓦屋之盟左氏以為齊平宋衛于鄭而程子以為
與鄭絕者蓋宋衛雖屈於齊而終不與鄭平也入
春秋來書盟者七皆二國相為盟自參盟作而諸
侯各樹其黨邦交離合無常會盟侵伐益多事矣
瓦屋周地三國會於此既不入覲於王而刑牲歃
血私相要結其蔑視王室之罪可勝誅哉是盟也

關於世道升降之機為甚故謹之

八月葬蔡宣公

公羊傳

卒何以名而葬不名卒從正而葬從主人

卒名謹終

辨實之正義葬稱公從臣子之辭

卒何以日而葬不日卒赴而葬不

告

穀梁傳

月葬故也

蔡侯考父卒以夏六月而以八月葬蓋踰月而葬矣諸侯五月而葬不及期簡也葬舉謚故不名不

日史失之

附錄

左傳八月丙戌鄭伯以齊人朝王禮也

鄭伯不以號公得政而背

王故禮之上有七月庚午下有九月辛卯則八月不得有丙戌

九月辛卯公及莒人盟于浮來

浮公羊穀梁作包此書好莒之始亦書魯君特

會外大夫之始浮來杜注紀邑在今山東莒州西

左傳公及莒人盟于浮來以成紀好也

二年紀莒盟于密為魯故今公

尋之故曰以成紀好

公羊

傳公曷為與微者盟

稱人稱人則從不疑也

從隨也稱

微者則非公從人盟
而人從公盟不疑矣

殺梁

傳 可言公及人不可言公及大夫

言大夫則敵公矣

公曷為及莒之微者盟左氏曰成紀好也及者內
為志凡公與疆國之大夫盟則不書公及諱疆國
之以無道加於公也及齊高傒晉處父盟是也與
小國之大夫盟則不諱公以公自欲與盟非為彼
所疆也然以望國之君而降班以盟小國之大夫
失禮亦甚矣

螟

民以食為天有災必書重民命也

附錄左傳

冬齊侯使來告成三國公使衆仲對曰君釋三

國之圖以鳩其民

鳩集也

君之惠也寡君聞命矣敢不

承受君之明德

冬十有二月無駭卒

駭殺梁作倭

左傳無駭卒羽父請謚與族公問族于衆仲衆仲對曰

天子建德

立有德為諸侯

因生以賜姓

若舜由嬀姓故陳為嬀姓

胙之土

而命之氏諸侯以字

諸侯位卑不得賜姓故其臣因氏其王父字為謚因

以為族

或使即先人之謚稱以為族

官有世功則有官族邑亦如

之

謂取其舊官舊邑之稱以為族

公命以字為展氏

諸侯之子稱公子公子之子稱

公孫公孫之子以王父字為氏無駭公子展之孫故為展氏

公羊

此展無駭也何以不氏疾始滅也故終其身不

氏

入極為始滅故終身貶之

穀梁

無駭之名未有聞焉或曰隱不爵大夫也或說

曰故貶之也

無駭公子展之孫也何以名公孫之子未賜族而為大夫者則書名與異姓之臣等也蓋古者置卿惟賢德是選有世祿而無世官春秋之初猶為近古故無駭與挾皆書其名而不氏耳其後大夫世官無不賜之族如魯三桓鄭七穆以字族也宋戴氏衛齊氏以謚族也晉士氏中行氏以官族也韓氏魏氏以邑族也子孫相繼亦世其官而不改而先王之禮亡矣故其弊至於三家專魯華向亂宋

六卿分晉諸侯失國而出奔者相繼則惟其不遵
先王世祿而不世官之禮是以此極也觀春秋
所書而是非之跡治亂之效昭然可覩矣

九年春天王使南季來聘

穀梁
傳

南氏姓也季字也聘問也聘諸侯非正也

古者天子於諸侯有時聘閒問之典所以洽恩惠
而通情志也載在周禮掌之行人而穀梁氏乃以
聘諸侯為非正何也按王制諸侯之於天子比年

一小聘三年一大聘五年則躬往述職而朝焉天子念其勤故有時聘遣問以慰答之今魯隱嗣世九年史策不書遣使如周亦不書公如京師則是朝聘之典俱缺也以王法論之貶爵削地在所不免而遣使聘焉其斯以為不正乎通經所書公如京師者一朝于王所者二卿大夫如京師者五魯於王室最親怠慢不臣如此則他國可知矣天王來聘于魯者七錫命者三歸賑者一賙葬者四恩

數稠疊若此則齊晉秦楚諸大國聘問之勤不後於魯又可知矣夫君臣上下之分特有紀綱禮法以維之王朝無紀綱而後征伐自諸侯出諸侯蔑禮法而後政事自大夫出豈一朝一夕之故乎記曰聘覲之禮廢則君臣之位失而倍畔侵陵之敗起矣可不戒哉

三月癸酉大雨震電庚辰大雨雪

左傳九年春王三月癸酉大雨霖以震書始也

書癸酉始雨日

庚辰大雨雪亦如之書時失也凡雨自三日以往為

霖平地尺為大雪

經有電無霖傳有霖無電傳不解經蓋所據簡策錯誤

公羊何以書記異也何異爾不時也何以書記異

也何異爾傲甚也

傲始怒也甚猶大甚也

穀梁

震雷也電霆也

電雷之光有霆必有電故曰電霆

志疏數也

八日之間再有大變陰陽錯行故謹而日之也雨月

志正也

雨得其時則書月

陽精發而為雷電陰氣凝而為雨雪陰陽運動宜

有常而無忒周之三月實夏之正月雷未可以出
電未可以見而大震電此陽失其節也雷既出電
既見則雪不當復降而大雨雪則陽不能制陰而
陰氣縱矣凡變見於天曰異害及於民曰災春秋
遇災異必書雖不若漢儒五行之說每事彊為徵
應而天人相感之際實未可忽也

挾卒

挾公羊穀
梁俱作使

公羊傳

使者何吾大夫之未命者也

穀梁

俠者所俠也

俠名也所其氏或云所斥也未詳孰是

弗大夫者隱

不爵大夫也隱之不爵大夫何也曰不成為君也

夏城郎

左傳夏城郎書不時也

隱公元年費伯已帥師城郎至此年復城之蓋因其舊而加修築也案桓十年三國來戰於此莊八年侯陳蔡師次於此十年齊宋之師又次於此是郎為魯之要地非不宜城而城以夏則非其時也

城以衛民而因此以奪農時則昧於為政之本矣

秋七月

穀梁傳無事焉何以書不遺時也

冬公會齊侯于防

防公羊作郚杜注魯地在琅瑯華縣東南今山東費縣東北有華城即華

縣

左傳宋公不王鄭伯為王左卿士以王命討之伐宋宋

以入郛之役怨公不告命

五年入郛在

公怒絕宋使秋

鄭人以王命來告伐宋

伐宋未得志故欲再伐之

冬公會齊侯

于防謀伐宋也

穀梁傳會者外為主焉爾

周禮大行人職時會以發四方之禁王事也至春秋諸侯或講好或謀事自相見於隙地或諸侯與鄰國之大夫相見或列國之大夫自相見竝以會名故凡書會皆譏也據左氏宋公不王鄭伯以王命討之使來告命會于防謀伐宋也于中丘為師期也果爾則奉王命討不庭經於會防及後伐宋

宜有異文以發明其善而與私會私伐者同辭以
是知其非王事也蓋矯假以逞私忿耳

附錄左傳

北戎侵鄭鄭伯禦之患戎師曰彼徒我車懼其

侵軼我也

軼突也

公子突曰

突鄭厲公也

使勇而無剛者嘗

寇而速去之

嘗試也勇則能往無剛不耻退

君為三覆以待之戎輕

而不整貪而無親勝不相讓敗不相救先者見獲必

務進進而遇覆必速奔後者不救則無繼矣乃可以

逞從之戎人之前遇覆者奔祝聃逐之

祝聃鄭大夫

束戎

師謂戎師在前後擊之盡殪也殪死戎師大奔十一月

甲寅鄭人大敗戎師

十年春王二月公會齊侯鄭伯于中丘

左傳十年春王正月公會齊侯鄭伯于中丘癸丑盟于

鄧為師期

傳言正月會癸丑盟推經傳日月癸丑是正月二十六日經二月誤盟不書蓋公還

告會而不告盟鄧杜注魯地當在今山東兗州府境

春秋之初諸侯擅興不過彼此修怨耳鄭伯為王

卿士無王命而會齊魯齊魯亦無王命而私與鄭

連兵自是諸侯始橫行而無所忌此禮樂征伐自諸侯出之始事也

夏鞏帥師會齊人鄭人伐宋

左傳夏五月羽父先會齊侯鄭伯伐宋

言先會明非公本期

公羊傳此公子翬也何以不稱公子貶曷為貶隱之罪

人也故終隱之篇貶也

終隱之世皆去其族至桓而復書族明與桓同惡也

鞏之恃逆其來有漸隱公不能辨之於早始焉伐鄭固請而行今茲伐宋先期而往肆行無忌不待

鍾巫之變而已知其有無君之心矣故兵柄下移
春秋屢致意焉以示當制之於未亂也若夫伐宋
之是非則直書其事而自見矣

六月壬戌公敗宋師于管

管杜注
宋地

左傳六月戊申公會齊侯鄭伯于老桃

經不書會不告
于廟也老桃杜

注宋地今山東濟寧州北有桃鄉城六
月無戊申戊申五月二十三日日誤

壬戌公敗宋師于管

穀梁傳內不言戰舉其大者也

戰然後敗故
敗大子戰

兩軍皆陳曰戰今不言戰而言敗蓋不待陳而薄
人於險以詐謀取勝也故以敗之者為主橋假王
命棄好怒鄰而遂鄭報怨之私雖以正用兵猶貶
況以詐譖取勝乎

辛未取郛辛巳取防

郛在今山東城武縣東南
防在今山東金鄉縣西

左傳庚午鄭師入郛辛未歸于我庚辰鄭師入防辛巳

歸于我君子謂鄭莊公于是乎可謂正矣以王命討

不庭

下之事上皆
成禮于庭中

不貪其土以勞王爵正之體也

勞者

叙其勤以答之魯爵尊
鄭爵卑故言以勞王爵

公羊 取邑不日此何以日一月而再取也何言乎一

月而再取甚之也內大惡諱此其言甚之何春秋錄
內而畧外于外大惡書小惡不書于內大惡諱小惡

書

明取邑為小惡一月再取小
惡中甚者耳故書而不諱

殺梁 取邑不日此其日何也不正其乘敗人而深為

利取二邑故謹而日之也

經於二邑書魯取地歸於魯也傳書鄭入而歸於

魯蓋鄭實主兵故讓魯取之也魯宋同盟未嘗有
怨入郛不救其曲在魯乃中變而合鄭以讎宋實
由輸平歸祊以利相結故既勝之後復以二邑讓
魯直書其事而背義尚詐結黨肆暴之惡具見矣

附錄

左傳蔡人衛人邾人不曾王命

不伐宋也

秋宋人衛人入鄭

齊魯地遠宋量力不能報故先結衛以報鄭鄭方
息師於郊不暇守禦故入之易諸侯不務講信修

睦而結黨報復反覆相攻皆由王政不綱是以肆行而無所忌也

宋人蔡人衛人伐戴鄭伯伐取之戴公羊穀梁作戴戴國子姓杜注陳留外

黃縣東南有戴城今河南考城縣東南考城故城是也

左傳七月庚寅鄭師入郊猶在郊駐兵遠郊誘三國敵其師因而取之

宋人衛人入鄭蔡人從之伐戴八月壬戌鄭伯圍戴
癸亥克之取三師焉宋衛既入鄭而以伐戴召蔡人
蔡人怒故不和而敗

公羊傳 其言伐取之何易也其易奈何因其力也因誰

之力因宋人蔡人衛人之力也

穀梁傳 不正其因人之力而易取之故主其事也

戴居鄭之北郕三國入鄭而不能克故移兵以伐其附庸鄭伯乘其敝與戴合攻而取三師其殘民

甚矣

附錄 九月戊寅鄭伯入宋 報入鄭也九月無戊寅

左傳

九月戊寅鄭伯入宋

戊寅八月二十四日

冬十月壬午齊人鄭人入郕

郕公羊作盛

左冬齊人入邾討違王命也

傳穀梁入者內弗受也日入惡入者也邾國也

二國入邾以邾不會伐宋也宋以公子馮在鄭故
二國交惡左氏傳云宋公不王鄭伯以王命討之
據經所書不見其為王討也王臣不行王師不出
矯假以逞私忿耳蓋齊所欲者邾也鄭所欲者許
也鄭助齊以入邾故明年秋齊復助鄭以入許徇
私結黨馮弱暴寡其惡極矣按傳隱三年周人將

昇虢公政與鄭交惡六年鄭伯朝周王不禮焉八
年虢公作卿士于周是年鄭伯以齊朝王九年以
王命討宋於時鄭伯為王左卿士疑因再朝王復
任之而鄭之朝王陰欲假王命以撓諸侯而報私
怨也觀其前則有取麥取禾之悖觀其後且為繻
葛之戰矣春秋之不王孰有過於鄭莊者左氏蔽
於其迹而不究其情當以程子之說正之

十有一年春滕侯薛侯來朝

此書諸侯朝魯之始薛任
姓杜注魯國薛縣今薛城

在山東
滕縣南

左十一年春滕侯薛侯來朝爭長薛侯曰我先封

薛祖

奚仲夏所封

滕侯曰我周之卜正也

卜正卜官之長周禮有春官大

在周之前

卜薛庶姓也

非周同姓

我不可以後之公使羽父請于薛

侯曰君與滕君辱在寡人周諺有之曰山有木工則
度之賓有禮主則擇之周之宗盟異姓為後寡人若
朝于薛不敢與諸任齒君若辱貶寡人則願以滕君
為請薛侯許之乃長滕侯

公羊傳 其言朝何諸侯來曰朝大夫來曰聘其兼言之

何微國也

穀梁傳

天子無事諸侯相朝正也

事謂巡狩崩葬兵革之事

考禮修

德所以尊天子也諸侯來朝時正也

朝宜以時故書時則正也

牷

言同時也

牷言謂別言也如穀伯鄧侯來朝同時來不俱至

累數皆至也

累數

總言之也如滕薛來朝同時俱至

周禮行人職凡諸侯之邦交殷相聘世相朝也其

為禮亦節矣周衰典禮大壞邦交惟視勢之彊弱

以魯事考之或來朝而不報其禮或屢往而至於
不納無復有以禮義相接者矣況于天子述所職
者蓋闕如也而自相朝聘可乎故經於大國來聘
小國來朝一切書而不削惡其慢於王事也且非
天子不旅見諸侯滕薛二君不各書來朝而累數
之與穀伯鄧侯之來朝異文是同日而旅見矣隱
公偃然而受之罪可勝誅乎

夏公會鄭伯于時來

公羊穀梁夏字下有五月時來公
羊作祁黎杜注時來邾也榮陽縣

東有釐城鄭地在
今河南開封府東

左傳夏公會鄭伯于邾謀伐許也鄭伯將伐許五月甲

辰授兵于大宮鄭祖廟公孫闕與潁考叔爭車公孫闕鄭大夫

潁考叔挾輶以走輶車子都拔棘以逐之子都即公孫闕棘戟

也及大逵逵道方九軌弗及子都怒

會者外為主此會鄭志也許遠於齊魯而鄰於鄭
鄭莊日思兼并然不藉鄰國之勢則動非萬全故
前年伐宋克其二邑鄭不取而讓於魯又助齊入

邾齊魯之交益固然後連兵以壓許蓋鄭計入許之後齊魯不能越國以鄙遠則已安坐而得之矣齊魯特為其所愚而不覺耳故時來之會以鄭主之也

秋七月壬午公及齊侯鄭伯入許

許今河南許州故城在州東北

左傳秋七月公會齊侯鄭伯伐許庚辰傅于許

附于城下潁

考叔取鄭伯之旗蝥弧以先登

蝥弧旗名

子都自下射之

顛而墜

瑕叔盈又以蝥弧登

瑕叔盈鄭大夫

周麾而呼曰君

登矣鄭師畢登壬午遂入許許莊公奔衛齊侯以許

讓公公曰君謂許不共故從君討之許既伏其罪矣

雖君有命寡人弗敢與聞乃與鄭人鄭伯使許大夫

百里奉許叔以居許東偏

許叔許君弟
東偏東鄙也

曰天禍許國

鬼神實不逞于許君而假手于我寡人寡人唯是一

二父兄不能共億

共給億
安也

其敢以許自為功乎寡人

有弟不能和協而使餬其口于四方

弟謂共叔段餬
驚也說文云寄

食其況能久有許乎吾子其奉許叔以撫柔此民也

吾將使獲也佐吾子

獲鄭大夫

若寡人得沒于地天其以

禮悔禍于許無寧茲許公復奉其社稷

無寧也

唯我鄭

國之有請謁焉如舊昏媾其能降以相從也無滋他

族實偏處此以與我鄭國爭此土也吾子孫其覆亡

之不暇而況能禋祀許乎寡人之使吾子處此不唯

許國之為亦聊以固吾圉也

圉邊垂也

乃使公孫獲處許

西偏曰凡而器用財賄無寘于許我死乃亟去之吾

先君新邑于此

先君謂武公周宣王封弟友為鄭伯食米于畿內友之子武公從平王東

遷取號鄩二國之王室而既卑矣周之子孫日失其地居之乃為新鄭

序夫許大岳之胤也

大岳神農之後堯四岳也

天而既厭周德矣

吾其能與許爭乎君子謂鄭莊公于是乎有禮禮經

國家定社稷序民人利後嗣者也許無刑而伐之

刑法

也服而舍之度德而處之量力而行之相時而動無

累後人

死乃亟去之言欲不累後人也

可謂知禮矣

鄭伯使卒出

玃行出犬雞以詛射潁考叔者

玃猪别名百人為卒二十五人為行君

子謂鄭莊公失政刑矣政以治民刑以正邪既無德

政又無威刑是以及邪邪而詛之將何益矣

及者內為主時來書公會鄭伯明伐許本鄭志也
此書公及齊侯鄭伯則入許者公所欲也蓋自輸
平而後宛來歸祊又助魯取二邑於宋故公欲助
鄭并許以為報也隱公即位十有一年受天王之
使而未嘗朝聘王室告喪既不奔赴且無賄賂擅
興甲兵植黨肆暴奪人城邑今又助鄭為虐入人
之國而逐其君其不善之積蓋有不可逭者矣

附錄王取鄔劉為邾之田于鄭鄔杜注緱氏縣西南有鄔聚在今河南偃

師縣西南劉杜注緱氏縣西北有劉亭今亦屬偃師縣為在今河南懷慶偃師孟縣之間邾今河南河內

縣西北邾而與鄭人蘓忿生之田蘓忿生周武王溫臺鎮是也

前注見原杜注在沁水縣西今河紆杜注在野王今河

樊杜注一名陽樊野王縣西南隰郕杜注在懷縣西

縣西南隰攢茅杜注在修武縣北今河南向縣杜注軹

地名向今濟源杜注盟津在州縣今故縣西南有向城今孟縣南城杜注州縣今故

東陘杜注關元和志太行陘在河內縣西北隤杜注

武縣北京相璫曰河內懷

懷

杜注懷縣今武陟縣西有懷縣故城十二邑皆蘓忿

生之

田君子是以知桓王之失鄭也恕而行之德之則

也禮之經也已弗能有而以與人人之不至不亦宜

乎

蘓氏叛王十二邑王所不能為桓五年從王伐鄭張本

鄭息有違言

息國名姬

姓侯爵今河南息縣息侯伐鄭鄭伯與戰于竟息師

違言以言語相違恨大敗而還君子是以知息之將亡也不度德不量力

不親親

鄭息同姓之國

不徵辭不察有罪犯五不韙而以伐

人也

韙是

其喪師也不亦宜乎

冬十月鄭伯以虢師

伐宋壬戌大敗宋師以報其入鄭也

入鄭在十年

宋不告

命故不書凡諸侯有命告則書不然則否

傳因宋不告敗而發

此例師出臧否亦如之雖及滅國滅不告敗勝不告克

不書于策

冬十有一月壬辰公薨

左羽父請殺桓公將以求大宰

大宰官名

公曰為其少故

也吾將授之矣使營菟裘吾將老焉

菟裘杜注魯邑在泰山梁父縣

南今山東泰安州南泗水縣北有梁父城菟裘聚羽父懼反譖公于桓公而

請弑之公之為公子也與鄭人戰于狐壤止焉

內諱獲故

言止狐壤鄭地後漢志潁川郡潁陰縣有狐宗鄉疑即此在今河南許州西

鄭人因諸尹

氏

尹氏鄭大夫

賂尹氏而禱于其主鍾巫

主尹氏所主祭

遂與尹

氏歸而立其主

立鍾巫于魯

十一月公祭鍾巫齊于社園

園館于寫氏

寫氏魯大夫

壬辰羽父使賊弑公子寫氏立

桓公而討寫氏有死者

欲以弑公之罪加寫氏而不能正法僅有死者而已不

書葬不成喪也

公羊傳

何以不書葬隱之也何隱爾弑也弑則何以不

書葬春秋君弑賊不討不書葬以為無臣子也子沈

子曰

稱子冠氏上者著其為師也

君弑臣不討賊非臣也不復讎

非子也葬生者之事也春秋君弑賊不討不書葬以為不繫乎臣子也公薨何以不地不忍言也隱何以無正月隱將讓乎桓故不有其正月也

穀梁傳

公薨不地故也隱之

隱猶痛也

不忍地也其不言葬

何也君弑賊不討不書葬以罪下也隱十年無正隱不自正也元年有正所以正隱也

明隱宜立

死者人道之終也故春秋于魯君之薨路寢而外
于小寢于別宮臺下皆明著其地至薨而內地則
有不忍言者矣不書葬賊不討也使書公薨于寫
氏桓輦之罪非徒不討後世且無由而識之矣不
書地以著君父不得其死之實不書葬以警臣子
復讎討賊之心非聖人莫能修此類是也

日講春秋解義卷四

欽定四庫全書

日講春秋解義卷五

桓公

公名軌惠公之子隱公之弟弑凡自立史記一名允謚法辟土服遠曰桓

周

桓王九年魯桓公十五年桓王崩子莊王立

鄭

莊公三十三年魯桓公十一年莊公卒子昭公忽立是年忽奔衛厲公突立桓十五年厲公奔蔡昭公歸秋突入于櫟桓十七年昭公弑立于儀

魯桓十八年齊殺魯祭仲立于儀

齊

僖公二十年魯桓公十四年僖公卒子襄公諸兒立

宋

殤公九年魯桓公二年殤公弑莊公馮立

晉

翼哀侯七年魯桓公二年哀侯侵陘庭陘庭與曲沃武公謀桓三年曲沃伐翼獲哀侯晉人立其子

小子侯桓七年曲沃武公殺小子侯桓八年曲沃滅翼冬王命虢仲立晉哀侯之弟緡于晉○曲沃

武公六年

衛

宣公八年魯桓公十二年宣公卒惠公朔立桓十六年惠公奔齊公子黔牟立

蔡

桓侯四年魯桓公十七年桓侯卒子哀侯獻舞立

曹

桓公四十六年魯桓公十年曹桓公卒莊公射姑立

滕

詳見隱公元年

陳

桓公三十四年魯桓公五年陳桓公卒陳佗殺太子免而自立桓六年蔡人殺陳佗厲公躍立桓十二年

厲公卒莊
公林立

杞
武公詳見
隱公元年

薛
詳見隱
公元年

莒
詳見隱
公元年

邾
儀父詳見
隱公元年

許
許叔詳見隱公元年魯桓
公十五年許叔入于許

小邾
詳見隱
公元年

楚
武王三十年魯桓公六年伐隨使隨請周尊楚號周
室不聽還報楚桓公八年熊通怒自立為楚武王與

隨人盟而去詳見
莊公四年傳註

秦

詳見隱
公元年

吳

詳見隱
公元年

越

詳見隱
公元年

欽定四庫全書

日講春秋解義卷五

桓公

名軌史記名允惠公之子隱公之弟以桓王九年即位諡法辟土服遠曰桓

元年

人君繼世踰年改元自是循數以編年雖久而不易至漢孝文改後元年孝武又因事別建年號歷代因之或一世而屢易或一歲而再更記注繁蕪莫可勝紀乃知春秋編年為萬世不易之法也

春王正月公即位

公羊 繼弑君不言即位此其言即位何如其意也弑君

欲即位故如其意以著其惡

穀梁 桓無王其曰王何也桓公十八年唯元年二年十年十八年有王自外皆

無王故傳 據以發問謹始也其曰無王何也桓弟弑兄臣弑君

天子不能定諸侯不能救百姓不能去以為無王之

道遂可以至焉爾元年有王所以治桓也 繼故不

言即位正也故謂 繼故不言即位之為正何也曰先弑也

君不以其道終則子弟不忍即位也繼故而言即位則是與聞乎弑也繼故而言即位是為與聞乎弑何也曰先君不以其道終已正即位之道而即位是無

恩于先君也

推其無恩則知與弑也

繼故而書即位則為與聞乎弑何也以無哀先君之心故泰然而行即位之禮也桓公之書即位與文成襄昭同何以知其與聞乎弑也隱公之薨不地不葬則不以道終顯然矣桓之篇十四年春不

書王以王綱不振故篡弑之賊得泰然而安于其位也元年書王以踰年即位正王法當行之日也然則公羊氏所稱桓幼而貴隱長而卑者非乎非也諸侯不再娶惠公元妃既卒繼室以聲子則是攝行內主之事矣隱之立正也其欲授桓實讓而非攝也隱讓而桓弑罪不容於誅矣

三月公會鄭伯于垂

傳

梁會者外為主焉爾

鄭伯所以欲為此會者為易田故

鄭伯欲得許田以自廣是以為垂之會蓋知桓之篡逆意不自安特假以求賂焉度魯急於會諸侯必從所欲故也夫鄭莊與隱公同盟締好今見其賊不能討反有所要求欲以定其位故書公會鄭伯會者外為主言鄭志也

鄭伯以璧假許田

左傳元年春公即位修好于鄭鄭人請復祀周公卒易祊田事在隱八年公許之三月鄭伯以璧假許田為周公

妨故也

魯不宜聽鄭祀周公又不宜易取妨田犯二不宜以動故隱其實不言妨稱壁假言若進

壁以假田

非久易也

公羊傳

其言以壁假之何易之也易之則其言假之何

為恭也

使若暫假借之辭

曷為為恭有天子存則諸侯不得

專地也許田者何魯朝宿之邑也諸侯時朝乎天子

天子之郊諸侯皆有朝宿之邑焉

古者諸侯朝于天子至遠郊不敢便

入必先告至天子以諸侯遠來朝為告至之須當有所止宿故賜邑于遠郊其實天子地諸侯不得專也

此魯朝宿之邑也則曷為謂之許田諱取周田也諱

取周田則曷為謂之許田繫之許也曷為繫之許近

許也此邑也其稱田何田多邑少稱田

邑外之田畝多邑內之家

數少則稱田

邑多田少稱邑

邑內之家數多邑外之田畝少則稱邑

穀梁傳

假不言以言以非假也非假而曰假諱易地也

禮天子在上諸侯不得以地相與也無田則無許可

知矣不言許不與許也

但言以璧假許而不繼田則許屬鄭也今言許田明以許

之田與鄭不與許邑

許田者魯朝宿之邑也邠者鄭伯之所受

命而祭泰山之邑也

泰山非鄭竟從天王巡狩受命而祭也

用見魯之

不朝于周而鄭之不祭泰山也

擅相易則知朝祭並廢

隱公八年鄭來歸祊本欲易許田也魯受祊而未與許田以祊薄於許也及桓公弑立鄭伯乘其位之未定復要許田而加璧以請焉知桓方自危不敢不從也其不曰以璧易而謂之假者為國諱惡且示有歸道也桓乃無父無君之人則棄先祖之地廢朝覲之禮曾不以動其心宜矣

夏四月丁未公及鄭伯盟于越

越杜注近垂地名當在今山東曹州附近

左夏四月丁未公及鄭伯盟于越結祊成也盟曰渝盟無享國

穀梁傳及者內為志焉爾越盟地之名也

鄭伯先為垂之會以求許田公既以許田委鄭而因欲固鄭好以自安故復為此盟書公及魯志也衛州吁弑桓公而自立則朝陳而請覲於王曹負芻弑宣公之子而自立諸侯與會于戚而執之曹人請于晉曰若有罪則君列諸會矣亂臣賊子所

懼者天子之征鄰封之討耳天子而許之覲鄰國而與之會則可安於其位矣此衰周之亂政也魯自隱公以來與齊鄭親鄭伯數假王命以興師戰克攻取諸侯畏之故桓公不惜棄先祖之地以求為此盟而又求昏於齊以自固也至鄭伯之惡則不待貶絕而自見矣

秋大水

此書水災之始

左傳秋大水凡平原出水為大水

廣平曰原雨自上而下浸潤于土陂障下

地可使水潦停焉平原高地不應有水而云出水者水不入于土而出于地上也

公羊傳何以書記災也

穀梁傳高下有水災曰大水

水災陰沴之發也大者非常之詞書大水則害禾稼毀廬舍不待言矣書時不書月以見泛濫為害歷時未平也變不虛生蓋可忽乎哉

冬十月

穀梁傳無事焉何以書不遺時也春秋編年四時具而

後為年

附錄冬鄭伯拜盟

鄭伯若自來則經不書若遣使則當言鄭人不得稱鄭伯疑謬誤

宋華父督見孔父之妻于路

華父大夫氏督名宋戴公孫孔父宋大司

馬父具名穀梁以父為字諡非也

目逆而送之曰美而艷

二年春王正月

穀梁傳

桓魚王其曰王何也正與夷之卒也

元年書王篡弑之賊踰年即位而臨臣民王法宜急施也二年復書王喪期未畢猶冀王之能討也

過此而不討則終無望矣故三年以後不復書王也先儒以為正宋督之弑義亦可通但二百四十年他國有篡弑之變未嘗不書王則非春秋之本指也

戊申宋督弑其君與夷及其大夫孔父

左傳

二年春宋督攻孔氏殺孔父而取其妻公怒督懼

遂弑殤公君子以督為有無君之心而後動于惡故先書弑其君

公羊傳

及者何累也

從君而死曰累

弑君多矣舍此無累者乎

曰有仇牧荀息皆累也

仇牧事在莊十二年荀息事在僖十年

舍仇牧

荀息無累者乎曰有有則此何以書賢也何賢乎孔

父孔父可謂義形于色矣其義形于色奈何督將弑

殤公孔父生而存則殤公不可得而弑也故于是先

攻孔父之家殤公知孔父死已必死趨而救之皆死

焉孔父正色而立于朝則人莫敢過而致難于其君

者孔父可謂義形于色矣

穀梁傳 孔父先死其曰及何也書尊及卑春秋之義也

孔父之先死何也督欲弑君而恐不立于是乎先殺

孔父孔父閑也

閑捍禦也

何以知其先殺孔父也曰子既

死父不忍稱其名臣既死君不忍稱其名以是知君

之累之也孔氏父字諡也或曰其不稱名蓋為祖諱

也孔子故宋也

孔父既死而後殤公弑先書弑君者督有無君之

心而後敢加刃于孔父也書及其大夫襄死節也

孔父不能早正殤公之德預遏華督之姦而春秋
褒其節何也孔父生而存則殤公不可得而弑其
正色立朝實足以衛宗社而怵姦邪不可以變出
意外而遂沒其節也觀華督及徒人費石之紛如
賈舉州綽之類皆與君偕死而不書則知書者皆
春秋之所予矣

滕子來朝

滕侯國何以稱子時王所貶也王政之不行于諸

侯久矣何以能加于滕小國猶有聽命者也故杞
於桓以侯見至僖而書于薛於隱以侯見至莊而
書伯與滕子為三皆微國也大國莫見焉杞于僖
以子見至文復書伯亦時王進之也或以為孔子
之褒貶非也諸侯之惡有大于三國者矣何以不
貶以是知其不可通也按卓氏爾康曰灌甫曰樂
正子記滕薛旅朝隱公桓王聞之微朝皆黜焉則
信而有徵矣

三月公會齊侯陳侯鄭伯于稷以成宋亂

稷杜注宋地當在今河南

歸德府境

左傳會于稷以成宋亂為賂故立華氏也

言立以爲卿

宋殤

公立十年十一戰民不堪命孔父嘉為司馬

嘉孔父字督

為大宰故因民之不堪命先宣言曰司馬則然已殺

孔父而弑殤公召莊公于鄭而立之以親鄭

莊公公子馮也

隱三年出居于鄭以部大鼎賂公

部國所造之鼎故名部大鼎部杜注國名濟陰城武

縣東南有部城蓋部有二城南部城則為宋邑隱十年取部是也北部城則為部國俱在山東城武縣

齊陳鄭皆有賂故遂相宋公

公羊傳

內大惡諱此其目言之何目指遠也所見異辭

所聞異辭所傳聞異辭隱亦遠矣曷為為隱諱謂觀

事

隱賢而桓賊也

桓篡弑與宋督同惡相濟故賤不為諱也

殺梁

以者內為志焉爾公為志乎成是亂也此成矣

取不成事之辭而加之焉

取不成事之辭若云宋亂本不可成桓實強成之

于內之惡而君子無遺焉爾

桓弑逆之人故極言其惡無所遺漏

會未有言其所為此特言所為者盖事關世變篡

弑之禍接迹天下自此會始也向也合五國之君
大夫以定州吁而州吁卒討今也合四國之君以
立華督而督遂世為國卿亂臣賊子自是泰然無
所忌憚矣春秋諱國惡獨此直書公會以桓公身
為大惡諸侯不能討其亂而反與共會成宋亂乃
人道之極變也春秋特書所為者二此會與澶淵
之會是也蓋不書以成宋亂則此會疑謀討華督
不書宋災故則澶淵之會疑謀討蔡般此所謂大

義數十炳如日星聖人直書以著褒貶者也

夏四月取部大鼎于宋戊申納于大廟

左傳夏四月取部大鼎于宋戊申納于大廟非禮也臧

哀伯諫曰

哀伯魯大夫傷伯之子

君人者將昭德塞違以臨照

百官猶懼或失之故昭令德以示子孫是以清廟茅

屋

清廟肅然清靜之稱茅屋以茅飾屋

大路越席

大路玉路祀天車大也越席結草為席

羹不致

大羹肉汁不致五味

粢食不鑿

黍稷曰粢不精鑿

昭其儉也衮

冕黻珽

衮畫衣冕冠也黻韋韠以黻膝珽玉笏也

帶裳幅舄

帶草帶裳下衣幅今之行

膝偏束其脰自衡統紘紗衡維持冠者統冠之垂者足至膝舄履復履

昭其度也藻率鞞鞞藻率以韋為之所以藉玉鞞鞞佩刀削上飾鞞下飾

厲游纓鞞大帶厲大帶之垂者游昭其數也火龍黼

黻火畫火也龍畫龍也白與黑謂之黼文如斧黑與青謂之黻文如兩已相背昭其文也

五色比象車服器械之有五色皆以比象天地四方昭其物也示器物不虛設錫

鸞和鈴錫在馬額鸞在鑣和在銜鈴在旂昭其聲也三辰旂旗日月星為

三辰畫昭其明也夫德儉而有度登降有數登降謂上下尊卑

卑文物以紀之聲明以發之以臨照百官百官于是

乎戒懼而不敢易紀律今滅德立違

謂立華督連命之臣

而寘

其賂器于大廟以明示百官百官象之其又何誅焉

國家之敗由官邪也官之失德寵賂章也郃鼎在廟

章孰甚焉武王克商遷九鼎于洛邑

九鼎殷所受夏九鼎也武王克

商乃營洛邑而遷九鼎焉洛邑杜注武王但營洛邑

未有都城周公乃卒營洛邑謂之王城即河南城也

今河南洛陽縣城內

義士猶或非之夷齊之屬

而况將昭

違亂之賂器于大廟其若之何公不聽周內史聞之

曰內史周大夫官臧孫達其有後于魯乎君違不忘諫之以

德

公羊傳

此取之宋其謂之郛鼎何器從名

從舊主地從之名

主人

從見在得地之主人

器何以從名地何以從主人器之與

人非有即爾

器之始造各有主非今有之而即可為是人之器也故其名必從本主

宋

始以不義取之故謂之郛鼎至乎地之與人則不然

俄而可以為其有矣

土地無常主故俄而可以為其有矣

然則為取可

以為其有乎

承上文言地既可以為俄而為所有則既為所取遂可以為所有而于義無傷乎

曰否何者若楚王之妻媢無時焉可也

媢妹也引此為喻明其終

不可為
有也
何以書譏何譏爾遂亂受賂
遂成納于大

廟非禮也

穀梁
傳桓內弑其君外成人之亂受賂而退以事其祖

非禮也其道以周公為弗受也郕者郕之所為也

曰宋取之宋也
郕本郕國所以是為討之郕也
討宋

更受其賂
孔子曰名從主人
謂作郕物從中國
謂郕故在宋

曰郕大鼎也

宋以郕鼎賂公不曰宋人來歸而曰取于宋蔽罪

于魯也曰郕大鼎宋本以不義取鼎于郕而魯又取之于宋也定弑逆之賊取其賂器寘于大廟以明示百官其後公子牙慶父仲遂意如之惡豈非則而象之者與取者得非其有之稱納者內不受之辭不曰獻而曰納其義以先祖為不受也春秋書致賂者三宋以郕鼎賂而書魯取蔽罪于魯也魯以濟西賂而書齊取蔽罪于齊也齊致衛寶而書齊人來歸明齊首惡且結正諸侯之罪不獨在

魯也

秋七月杞侯來朝

公羊穀梁皆作紀侯

左傳秋七月杞侯來朝不敬杞侯歸乃謀伐之

穀梁傳

朝時此其月何也

前滕侯薛侯來朝止稱時

桓內弑其君外

成人之亂于是為齊侯陳侯鄭伯討數日以賂

討計為

三國計功勞數日

已即是事而朝之

已紀也

惡之故謹

而月之也

左氏誤以紀為杞見下有入杞事遂為不敬之說

杞爵非侯文誤也及紀侯大去之後杞無以侯見者矣故知凡杞稱侯者皆當為紀

蔡侯鄭伯會于鄧

鄧按公羊蓋鄧國今湖廣襄陽府東北鄧城是與杜注異

左傳蔡侯鄭伯會于鄧

鄧杜注潁川召陵縣西南有鄧城蓋蔡地也

始懼楚

也

楚杜注楚國南郡江陵縣北紀南城也今江陵縣屬湖廣荊州府紀南城在府北

公羊傳離不言會

二國會曰離

此其言會何蓋鄧與會爾

此外諸侯相會之始而楚為中國患已兆其端關於天下之故非小故春秋特書之荆楚負險恃彊

有道後服見于商頌周雅及周之衰僭號稱王威
行江漢至是遂有憑陵上國之心三國地與之近
是以懼而為會其後鄧首見滅蔡侯為俘終春秋
之世鄭被蹂躪不能自彊於政治而欲恃外交以
抗彊大果何益乎此孟子所以言以小事大惟在
於彊為善也

九月入杞

左傳九月入杞討不敬也

穀梁傳 我入之也

將卑師少外則稱人內則但云入某伐某故知入
杞者魯也或疑蔡鄧入杞然考之于經如滅偃陽
滅賴蒙前事而書者皆稱遂此不稱遂則為魯入
無疑矣

公及戎盟于唐

左傳 公及戎盟于唐修舊好也

忠隱之好

隱公因戎請至再而後與之盟今戎未嘗請而桓

及之盟蓋身負大惡欲結好以自固與及鄭盟越之意同也

冬公至自唐

此書至之始

左傳冬公至自唐告于廟也凡公行告于宗廟反行飲

至舍爵策勲焉禮也

爵飲酒器既飲置爵則書勲勞于策速紀有功也

特相

會往來稱地讓事也

特相會公與一國會也會必有主二人獨會則莫肯為主彼此

相讓會事不

成故但書地自參以上則往稱地來稱會成事也

成會

事

穀梁傳

桓無會而其致何也遠之也

桓會甚衆而曰無會者無致會也此

以達故危而致之

凡君行告于宗廟反必告至禮之常也其不書至者未行飲至之禮也凡書至皆稱自會以盟皆因會而為之還時雖并以盟告而出則未有以盟告者故不云至自盟也其或會盟之後復有侵伐之事如僖二十八年會于溫遂圍許而書公至自圍許襄十年會于柰遂滅偃陽而書公至自會則時

史之異亦因其告廟之文本異而書於冊耳

附錄初晉穆侯之夫人姜氏以條之役生太子

注條杜

地今山西安邑縣有中條山縣北有鳴條岡穆侯七年戰條太子文侯也

命之曰仇

意取

仇其弟以千畝之戰生

弟桓叔也千畝杜注西河界休縣南有地名千畝今山西

介休縣有千畝原穆侯十年戰千畝

命之曰成師

意取能成其衆師服曰夫晉大

異哉君之名子也夫名以制義

名之必義以出禮禮從

義禮以體政

政以政以正民是以政成而民聽易則

生亂嘉耦曰妃怨耦曰仇古之命也

自古有今君命

太子曰仇弟曰成師始兆亂矣兄其替乎

太子桓叔
因戰為

名而所附意異故師服知桓
叔之黨必盛于晉以傾宗國惠之二十四年魯惠公也晉

始亂故封桓叔于曲沃

文侯卒子昭侯立危不自靖
安故封桓叔為曲沃伯

侯之孫欒賓傅之

靖侯桓叔之高祖以貴寵公孫為
傅相後遂為欒氏蓋其父字欒

師服曰吾聞國家之立也本大而末小是以能固故

天子建國

立諸侯也

諸侯立家

立卿大夫之家

卿置側室

側室眾子也得

立此

大夫有貳宗

大夫身是適子為小宗亦
立次者為貳宗以相輔貳

士有隸

子弟

士卑自以子弟為僕隸

庶人工商各有分親

庶人以親疎為

分皆有等衰

衰殺也自天子至于庶人各有等第降殺是以民服事其上

而下無覲覲

下不冀望上位

今晉甸侯也而建國本既弱矣

其能久乎惠之三十年晉潘父弑昭侯而納桓叔不

克

潘父晉大夫時桓叔入晉敗歸

晉人立孝侯

昭侯子

惠之四十五年

曲沃莊伯伐翼弑孝侯

莊伯桓叔子

翼人立其弟鄂侯鄂

侯生哀侯

鄂侯以隱五年奔隨其年王立哀侯于翼

哀侯侵陘庭之田

陘庭

杜注翼南鄙邑今山西翼城縣東南有楚庭城志云即陘庭也陘庭南鄙啟曲沃伐

翼

三年春正月

自三年以後月不繫王以著桓之無王與天王之失政也諸侯喪畢以士服見天子天子錫之爵命然後歸治其國桓弑其君又成人之亂當類見之期又不入見而請命焉是無王也桓王不能施九伐之法又明年而宰糾且下聘焉王綱盡墜天下自是不復知有王矣或以為周不頒歷昭公末年王室有子朝之亂豈暇頒歷而經皆書王非不頒

歷明矣又以為此闕文安得一公之內凡十四年
皆不書王為此說者皆不明于春秋討賊之義者
也

附錄

三年春曲沃武公伐翼

武公莊伯子

次于陘庭

凡師再宿

為信過

韓萬御戎

韓萬莊伯弟

梁弘為右

右戎車之右

逐翼侯

于汾隰

汾釋例

汾水出太原故汾陽縣西南至榮河縣

今汾水出山西靜樂縣

北入河靜樂漢

汾陽榮河

水邊

驂絳而止

驂駢馬

夜獲之國

云殺

及欒共叔

共叔桓叔之

傅欒賓之子

公會齊侯于羸

羸杜注齊邑泰山羸縣故城在今山東泰安州東南

左傳會于羸成昏于齊也

公不由媒介自與齊侯會而成昏

魯桓懼方伯之有討而乞昏于齊以為此會非媒而昏昏不以正也越境而會會不以正也使其私人往逆逆不以正也為齊侯而親迎迎不以正也故于羸之會謹而書之

夏齊侯衛侯胥命于蒲

蒲杜注衛地在陳留長垣縣西南今直隸長垣縣治故蒲城是

也

左夏齊侯衛侯胥命于蒲不盟也

公羊傳 胥命者何相命也

相命以言不軟血為誓

何言乎相命近

正也此其為近正奈何古者不盟結言而退

穀梁傳

胥之為言猶相也相命而信諭謹言而退以是

為近古也是必一人先其以相言之何也不以齊侯

命衛侯也

倡和理均不以齊大衛小而分別之

世至春秋列國多變傾危成俗盟詛多渝二國為

會相命以言不復刑牲歃血要質于鬼神故公羊

穀梁皆以為近古而荀卿亦謂春秋善胥命也或
謂相命為方伯則經當明著其事以正其不命于
王而私相命之罪矣按左氏莊二十一年鄭虢胥
命于弭同謀納王不可謂相命以伯況齊衛胥命
以後不聞有會盟侵伐之事其戰于郎及盟于惡
曹皆以鄭忽之故則非相命以伯明矣

六月公會杞侯于成

杞公羊作紀
鄭公羊作威

左傳公會杞侯于郎杞求成也

凡稱杞侯者皆當作紀紀侯懼齊欲親魯為援冀
抗齊鄭觀桓之六年復與公為郕之會而冬又來
朝則此會之為紀明矣

秋七月壬辰朔日有食之既

公羊傳既者何盡也

穀梁傳言日言朔食正朔也既者盡也有繼之辭也盡而

復生謂之既

言日言朔食正朔也既盡也歷家以日月交會月

掩日故日食食既則正相掩而日光為之盡也穀
梁傳曰言日言朔食正朔也言朔不言日食既朔
也言日不言朔食晦日也不言日不言朔夜食也
夫夜食而曉見其傷則時刻可稽何為不書朔與
日乎且使日食于亥子之交未出地而明復則雖
朝日何從見其虧傷之處耶蓋日食不占夜猶月
食不占晝是以唐一行算歷上溯往古千有餘年
日食常在晝月食常在夜春秋所書日食或有日

而無朔或有朔而無日或日朔竝失乃舊史有詳

略耳

公子翬如齊逆女

左秋公子翬如齊逆女修先君之好故曰公子

昏禮雖奉

時君之命其言必稱先君以為禮辭故公子翬逆女傳稱修先君之好公子遂逆女傳稱尊君命互舉其義

殺梁逆女親者也使大夫非正也

翬至桓公之編始稱公子桓以為謀主德其援立

而加崇寵也。輦為桓弑隱，即為桓逆女以結好于齊。所以定桓而因自固也。遂之于宣亦然，皆不待貶絕而罪惡見者也。

九月齊侯送姜氏于謹

謹杜注魯地濟北蛇丘縣西有下謹亭水經注云俗訛為夏暉

城今山東肥城縣西南有故城

左傳齊侯送姜氏非禮也。凡公女嫁于敵國，姊妹則上

卿送之以禮于先君。公子則下卿送之于大國。雖公子亦上卿送之于天子，則諸卿皆行。公不自送于小

國則上大夫送之

公羊傳何以書譏何譏爾諸侯越竟送女非禮也此入

國矣何以不稱夫人自我言齊父母之于子雖為鄰

國夫人猶曰吾姜氏

殺梁禮送女父不下堂母不出祭門諸母兄弟不出

闕門祭門廟門也闕兩觀也在祭門外父戒之曰謹慎從爾舅之言

母戒之曰謹慎從爾姑之言諸母般申之曰謹慎從

爾父母之言般裳也所以盛朝夕所須以備舅姑之用送女踰竟非禮也

謹魯地也父母兄弟無越竟送女之禮識齊侯也
入國矣何以不稱夫人未廟見猶未入國也故從
齊侯而為之辭

公會齊侯于謹

穀梁傳無譏乎曰為禮也齊侯來也公之逆而會之可
也

齊侯送女入魯竟公以會禮接之兩失之矣春秋
謹而書之所以正人倫之始也

夫人姜氏至自齊

公羊傳

翬何以不致得見乎公矣

穀梁傳

其不言翬之以來何也公親受之于齊侯也子

貢曰冕而親迎不已重乎

冕祭服

孔子曰合二姓之好

以繼萬世之後何謂已重乎

前書翬逆此不書翬以夫人姜氏至以桓既會齊侯而受之于謹也家人之初曰閑有家悔亡桓失其閑敝笱之刺兆矣

冬齊侯使其弟年來聘

左傳冬齊仲年來聘致夫人也

女出嫁隨使大夫聘問自魯出則曰致女自他國
來則總曰聘蓋以聘禮致故傳曰致女而經曰聘
也隱七年年嘗來聘隱弑而結昏于桓又使年來
聘深愛其女而以歸于篡弑之人所謂失其本心
者與

有年

公羊傳有年何以書以喜書也大有年何以書亦以喜

書也此其曰有年何僅有年也彼其曰大有年何宣謂

十六年大豐年也僅有年亦足以當喜乎恃有年也恃賴

也謂民猶賴此有年也

穀梁傳五穀皆熟為有年也

春秋二百四十二年之中豈無豐年而不見于經

惟于桓書有年于宣書大有年蓋桓宣享國皆十

有八年而書有年者各一歲則他年多歟而民不

聊生具見矣春秋獨于二公書有年以著其逆天而殃及于民也

附錄左傳芮伯萬之母芮姜惡芮伯之多寵人也故逐之

出居于魏

為明年秦侵芮張本杜注芮國在馮翊臨晉縣今陝西朝邑縣有芮故城在黃河

西岸魏杜注魏國河東河北縣括地志魏故國在芮城縣北今山西芮城縣河北故城是也孔疏世本芮

魏皆姬姓

日講春秋解義卷五